

Georgetown university u Washingtonu objavio knjigu "500 najutjecajnijih muslimana u svijetu"

Od tih "petsto najutjecajnijih" napravljen je uži izbor od "50 najutjecajnijih" među kojima je reisu-l-ulema prof. dr. Mustafa ef. Cerić na 39. mjestu.

Da bi se shvatila vrijednost selekcije 50 najutjecajnijih muslimana u svijetu dovoljno je, prema ovom saopćenju, spomenuti imena kao što su saudijski kralj Abdullah bin Ali Saud, koji je na prvom mjestu, te jordanski kralj Abdullah i marokanski kralj Muhammed VI, zatim državnici kao što su turski premijer Redžep Erdoan, te duhovni autoriteti kao što su ajatullah Ali Hamenei, šejh Jusuf Karadavi, ajatullah Husein Sistani, te egipatski muftija Ali Džum'a i mnogi drugi.

Knjiga pod naslovom "500 najutjecajnijih muslimana u svijetu za 2009. godinu" na prvom mjestu promovira „top listu od 50“ muslimana čiji utjecaj se može osjetiti u međunarodnom kontekstu.

Bez obzira na to što njihov utjecaj proizlazi iz različitih područja, svima im je zajedničko to da imaju značajan utjecaj na veliki broj ljudi.

Na top listi 50 najutjecajnijih muslimana istaknute su tri vrste ličnosti: kraljevi, duhovni učitelji i medijski edukatori.

Nakon isticanja 50 najutjecajnijih osoba, dolaze imena 450 muslimana iz svijeta podijeljenih u 15 kategorija – učenjaci, političari, administratori, tradicionalisti, propovjednici, žene, mladi, filantropisti, ljudi zaslužni za razvoj u nauci i tehnologiji, umjetnosti i kulturi, radikali, međunarodne islamske organizacije i pitanja današnjice.

U kategoriji umjetnost i kultura nabrojani su i top 10 najistaknutijih učača Kur'ana. Među njima je i naš Glavni imam Hfz. Aziz ef. Alili za koga se ističe da je rođen u Makedoniji, da se školovao u Sarajevu i da je svojim posebnim stilom učenja Kur'ana i ilahija ostavlja ogroman utjecaj na slušatelje.

Ostali devet učača Kur'ana su: Šejh Muhamed Tablawi iz Egipta, Maria Ulfah iz Indonezije, Šejh El Afasi bin Rashid iz Kuvajta, imami haremi šerifa: Šejh El Ajemi b. Ahmed Ali , Al Ghamidi Sa'd ibn Said , Al Mu'ayqali Mahir, Al Shuraim b. Saud, i As Sudais Abdurrahaman, Urednici navode da je cilj da se pomogne čitaocu u razumijevanju različitih načina na koje islam i muslimani utječu na svijet.

Ono što je, naglašava Mina, značajno za ovu knjigu jeste to da su glavni urednici dva etablirana i svjetski poznata profesora s **Georgetown university u Washingtonu**, John Esposito i Ibrahim Kalin.

Oni ovu knjigu predstavljaju kao prvu u godišnjem prikazu glavnih muslimanskih ličnosti u svijetu u nadi da će postati norma i da će se nastaviti ova vrsta izbora najutjecajnijih muslimana u svijetu.